

增補百病辨證錄總目

卷之一

傷寒門 四十三則

中寒門 七則

卷之二

中風門 二十五則

痺證門 十一則

脇痛門 五則

頭痛門 六則

腰痛門 六則

腹痛門 六則

卷之三

咽喉門 七則

牙齒門 七則

鼻淵門 三則

目痛門 十二則

血症門 二十一則

遍身骨痛門 四則

卷之四

五勞門 六則

咳嗽門 八則

怔忡門 三則

驚悸門 二則

不寐門 五則

健忘門 四則

狂病門 六則

呆病門 三則

喘門 四則

虛煩門 二則

癩癩門 六則

呃逆門 五則

耳痛門 七則

口舌門 二則

心痛門 六則

卷之五

關格門 五則

臍脹門 七則

中滿門 四則

厥症門 七則

翻胃門 五則

春溫門 三十三則

卷之六

火熱症門 十六則

暑症門 十一則

燥症門 十五則

痿症門 八則

卷之七

消渴門 五則

瘧症門 十一則

汗症門 五則

五痺門 十則

大瀉門 九則

痢疾門 十三則

癰疽門 八則

卷之八

瘧疾門 十則

虛損門 十二則

癆瘵門 十七則

夢遺門 七則

陰陽脫門 五則

淋證門 七則

卷之九

大便閉結門 九則

小便不通門 六則

內傷門 二十三則

疝氣門 附奔豚八則

陰痿門 五則

瘵症門 二十一則

卷之十

鶴膝門 二則

癰風門 二則

遺尿門 三則

脫肛門 二則

強陽不倒門 二則

發斑門 二則

火丹門 二則

離魂門 三則

疰夏門 二則

腳氣門 一則

中邪門 六則

中妖門 六則

中毒門 十二則

腸鳴門 三則

自笑門 附自哭三則

惱怒門 二則

瘡啞門 三則

瘟疫門 一則

種嗣門 九則

婦人科

卷之十一

帶門 五則

血枯門 二則

血崩門 七則

調經門 十四則

受娠門 十則

妊娠惡阻門 二則

卷之十二

安胎門 十則

小產門 五則

鬼胎門 一則

難產門 六則

血暈門 三則

胞衣不下門 二則

產後諸病門 十一則

下乳門 二則

卷之十三 外科

背癰門 七則

肺癰門 四則

肝癰門 二則

大腸癰門 三則

小腸癰門 三則

無名腫毒門 二則

對口疽門 一則

腦疽門 一則

囊癰門 二則

臂癰門 一則

乳癰門 四則

肚癰門 一則

多骨癰門 一則

惡疽門 一則

疔瘡門 一則

楊梅瘡門 五則

腰疽門 一則

掌疽門 一則

脚疽門 二則

髻疽門 一則

唇疔門 一則

癰疽門 二則

痔漏門 四則

頑瘡門 二則

接骨門 二則

金瘡門 一則

物傷門 三則

癰門 一則

刑杖門 一則

卷之十四 幼科

驚疳吐瀉門 七則

便虫門 二則

痘瘡門 十五則

疹症門 三則

喫泥門 一則

胎毒門 一則

辨證錄幼科卷之十四

山陰陳士鐸敬之甫號遠公又號朱華子著述

會稽陶式玉尚白甫號存齋又號

泰訂

驚疳吐瀉門 七則

兒科之病驚疳吐瀉為多四者又相為終始大約因疳而成吐因吐而成瀉因瀉而成驚故小兒口內流涎乃疳之兆也起首即治疳而吐瀉之症不作又何致驚症之生也惟其失治疳症而胃氣受傷矣小兒純陽原無損于陰氣傷胃氣者傷陽氣也陽傷陰亦傷矣傷陰者傷脾氣也人生後天以脾胃之氣為主脾胃兩傷無氣以養心而驚之症起矣是驚乃虛病而非有外風之入也然則吐瀉驚俱脾胃之虛寒而疳乃脾胃之寔熱也不知小兒因多食水菓以致口熱而成疳口熱似乎陽旺也然而陽極則變為陰矣故疳症既久而作吐正陽變為陰之驗也可見驚疳吐瀉俱是虛症補脾胃而四病皆易愈也世醫分驚為風分疳為熱分吐瀉為寒亦未深知小兒之症耳孰知單治脾胃之虛而四症不必治而自愈也方用活兒丹人參三錢白朮一錢甘草一分茯苓二錢陳皮一分巴戟天一錢白芍一錢柴胡二分當歸五分山查五分神麴三分水煎服一劑而驚疳吐瀉無不即安二劑全愈三劑不再發也此方健脾開胃又能平肝使肝亦無鬱沸之患自能疏通土氣變尅土之肝反為益土之肝矣脾胃無非生氣而吐瀉自止何至四肢無養變成角弓反張之急慢驚風哉

一小兒生疳上下牙床盡腫口角涼涎咳嗽不已咽喉腫痛人以為疳症脾熱也誰知是胃火之上
升乎夫既是胃火宜用泄火之藥瀉火而不效者以火過於盛將陽變為陰矣故用降火之藥以
瀉火而火不降轉至困憊者正內經所謂壯火食氣也蓋少火宜瀉而壯火宜補不補胃以治火
反瀉火以損胃安得而不加困憊哉治之法補其胃氣之虛少加息火之味則疳症不治而自愈
矣方用平肝湯茯苓三錢白朮一錢陳皮二分神麴五分麥冬二錢玄參二錢桔梗一錢蘇葉三
分人參三分枳殼二分黃芩三分水煎服一劑輕二劑又輕三劑而疳症愈不必四劑也此方補
胃以散火而火自平者以火出于土之中也土健而火藏土衰而火現故補其土而火藏于下又
何至上升于口頰之間乎況方中有鮮火之味在于補之內則土引火而自歸火亦隨土而歸矣
一小兒生疳之後飲茶水則吐後則不飲茶水而亦吐因弱之極人以為熱吐也誰知是熱變為寒
而吐乎夫疳症本熱也疳久則寒者以胃土之傷土衰則火旺火旺則土亦衰土益衰而前火之
旺自滅火土兩衰安得不寒乎況小兒最喜者生冷也土衰又加生冷自然作吐矣故止吐以健
胃為主單用止吐之藥吾未見其能止也即偶止吐于一時未必不動吐于後日惟健胃以止吐
則胃強而吐不再發也方用六君子湯加味用之人參一錢白朮二錢茯苓二錢甘草一片半夏
五分神麴三分陳皮三分白豆蔻一粒水煎服一劑即止吐二劑全愈此方健胃以止嘔治大人
尚有成功況小兒乎小兒嘔吐世人視為輕症往往不以為意變成大病而不可救以胃氣之傷
不能生養夫四肢而角弓反張之病現乃陰虛而成之也今以此方扶其胃氣胃健而飲食能受

既無嘔吐之傷自有灌注之益又何至有驚風之病哉

一小兒大吐之後忽然大瀉雖吐止而瀉不肯止倦怠之極人以為吐變瀉則其氣順矣誰知其氣愈逆乎夫吐能傷胃而瀉乃傷脾也氣順宜吐止而愈矣今吐止而大瀉乃胃傳於脾矣由腑而入臟是由表而入裏也較吐更甚蓋吐症補胃而可愈而瀉症宜兼補脾雖脾胃有同治之法補胃自必補脾但吐後作瀉則補脾必須補胃也方用生脾助胃湯人參三錢白朮三錢甘草三分肉桂一錢茯苓五錢神麴五分附子一片水煎服一劑而瀉止二劑全愈倘服之不應不必治之矣此方治小兒之瀉效驗如響百人中可救九十彼不應者乃陰陽兩絕之人也非藥之過耳世人見參附如酖毒不敢浪用醫生用之亦輒抵毀自陷於死亡哀哉

一小兒上吐下瀉眼目上視死亡頃刻其狀宛似慢驚風人以為驚風之症也誰知是脾胃之氣將絕乎小兒至此亦人鬼之關也若作慢風治之用牛黃等丸下喉即死矣夫脾胃之氣將絕是陰陽之氣欲脫也非急救其氣何能再活救氣之藥舍人參無第二味也世間之藥無過人參至四五錢以救嬰兒之吐瀉無論近人無此胆氣即古人亦無此方法毋怪嬰兒之多亡也予逢異人訓予救小兒垂危之症惟有多用人參可變危為安鐸試之無不奇效蓋小兒脾胃虛寒以致上吐下瀉正至危之症也宜多用人參以救之方用安兒至寶湯人參五錢白朮五錢茯苓三錢巴戟天三錢附子一錢麥芽一錢枳殼三分檳榔三錢車前子二錢白豆蔻三錢扁豆二錢蘿蔔子一錢水煎服一劑即吐止再劑瀉即止三劑全愈此方全在用參附之多所以能奪命於將危以

人參能回陽于既絕附子能續陰于已亡也然非羣藥佐之則陰陽不能分清濁而積穢亦不能祛除耳故用參朮以補氣少祛除自能奏功否則烏可已傷而再傷已絕而重絕乎世人但尚祛除全不識補中用攻之法所以勞而無功也

一小兒吐瀉之後角弓反張時而驚悸捧搗人以為驚風之病也誰知非風也乃肝尅脾胃之土而土氣欲絕耳此時萬不可治風一治風以定驚則立刻亡矣蓋既經吐瀉則陰陽兩亡所存者幾微之氣耳不急救脾胃以續氣反散風邪以損其氣欲不趋于陰得乎且脾胃欲絕補脾胃之土而不補命門心包之火則土寒而陽不可以遽回陰不可以驟長故必須補火以生土補土以止驚方用續氣湯人參一兩白朮一兩巴戟天五錢肉桂一錢生棗仁三錢遠志二錢茯苓五錢乾姜三分附子三分半夏一錢水煎服一劑安二劑更安三劑全愈此方以十歲為準每歲減二分毋論慢驚急驚以此方投之無不立效蓋急慢驚風俱是虛症非急為風而慢為虛也世人以驚為風悞矣不作風治則十人九活一作風治則十人十死以虛而兼風治則十人八死以大虛治而絕不治風則十人十活也喻嘉言謂驚風二字乃前人鑿空之談勸行醫者絕口不道其言雖過于憤激然亦深憫小兒之悞死于非命不得不大報以救之也但喻嘉言所立之方尚兼風治猶未洞悉底裏不若直補土以救驚補火以生土也

一小兒驚症有慢驚急驚之分世以急驚屬之風慢驚屬之虛以此區別治療生者頗多似乎其說之不可易矣誰知似是而非亦般人之說也蓋小兒從無有驚風之症此岐天師之所未定而雷

公之所不論者也。驚風二字乃末世之醫創言以殺小兒者也。自此言出，殺小兒不啻數百萬矣。小兒何嘗有風？一作風治千人，千死嗟乎！天心仁愛，何為使小兒不識不知，任其夭蕩耶？鐸授異人之教，救小兒驚症絕不治風，無論急驚、慢驚，以人參湯調服，立刻奏功，不敢自秘，罄書作簡以聽世人公用。人參三兩，白朮半斤，茯苓三錢，半夏一兩，廣木香三錢，柴胡一兩，枳榔五錢，荊芥炒黑五錢，白芍三兩，山查一兩，枳殼一兩，麥芽五錢，神麴一兩，甘草一兩，乾姜一兩，麥冬去心一兩，白菖蒲五錢，薄荷葉五錢，各為細末，蜜丸如龍眼大。凡遇急慢驚症，用一丸以人參三錢煎湯泡開送下，無不全活。方名保赤定驚丹。輕者一丸重則二丸，無有不愈者也。泡開必須用人參煎湯多多益善。若不用人參效驗不能十分之捷，然亦可免死亡之兆也。願世人共佩吾言，萬勿執驚症為風症，忍為殺人之醫也。

便蟲門 二則

小兒便中下寸白虫，或蟬蛭之虫，或吐出長短之虫，種種不一。人以為濕熱之虫也，誰知是脾胃之傷乎？小兒最喜食生冷之物，自然濕熱無疑，然而脾胃氣健雖有濕熱，自易分消，惟是脾胃之氣傷則難于運化，不生津液而生虫矣。倘徒治虫而不補其脾胃，則脾胃氣不能消，胃氣不能化，虫且安居無恙矣。夫何益哉？惟補其脾胃之氣，則氣旺而自能治虫，再佐以殺虫之藥，將何隙以逃生乎？此治之法，必須補中用攻也。方用治虫丹：白朮三錢，茯苓三錢，百部一錢，檳榔五分，史君子十個，枳殼五錢，白芍三錢，甘草三分，白薇二錢，黃連二分，半夏五分，水煎服二劑，而虫盡化為水矣。

但服藥之後務須忌飲湯水茶茗此方殺虫之藥雖多然入之健脾胃平肝之劑內則正氣無傷而虫又殺盡乃兩得之道也

小兒有糞門邊拖出長虫不肯便下又不肯進入直腸之內不痛不癢人以為虫口咬住也誰知乃崇憑之乎夫虫口咬住必然作痛今安然如故豈虫口之自咬耶虫既不咬宜隨糞而俱下今不下而留半截于中非崇憑而何病既崇憑宜非藥物可治然而人有一念之悔心醫即有一種之治法使人苟遷善而求醫無術又何以見吾道之大哉況父母未有不愛其子者見其子生虫之異未必不疑自身之譴尤而畏鬼神之作祟或告天而代為請禱或信佛而自訴祈求然而醫無以應之不幾阻人改過之門乎鐸得異人之傳用藥外点虫身則立刻化為水方名點虬丹水銀一錢冰片一錢礪砂一分雄黃三分樟腦一錢輕粉三分白芷一錢薄荷葉三分各研絕細末以不見水銀星為度水調少許点虫頭或身上少刻即盡化為水但點藥之時必虔拜上天然後點之則驗否則或驗或不驗也不須內服煎為至奇之方也余恐負異人之傳故罄書之辨証論後異人者余遊南嶽所逢道士自號雷公狀貌殊異傳鐸活人錄奇方最多此方其一也

痘瘡門 十五則

小兒將出痘身必發熱口必發渴眼必如醉此時當以表藥散之則火毒大解無如世人未敢信為出痘因循數日見点而始用表散有形之解與無形之解大有不同所以輕變重而重變死也雖然見点不用表藥則火毒又將安解豈不為得中醫而可望其自愈乎不知能善用表散之藥正

自有功耳大約痘瘡初出之時不可不用表散之藥而又不可全其表散當于補中表散之則正氣無傷而火毒又可盡解也方用至慈湯人參三分荊芥炒黑三錢生甘草一錢柴胡一錢當歸三錢茯苓二錢陳皮三分麥冬二錢玄參三錢天花粉一錢水煎服一劑火毒少除二劑火毒全散不必三劑也若已見點則重變輕而死變生矣此方正用柴胡荊芥以疏通其表裏得玄參以去其浮遊之火得生甘草以敗其毒妙在人參歸冬之類俱是補氣補津之味佐前藥以充其力使無壅閉之憂以速其至隱之火毒也世人治痘一見用補無不驚懼誰知火毒非補萬不能由內而發于外能于補中用表散之法何愁小兒之不盡登于壽考也此方十歲為準如遇歲小兒用十分之一每歲增加可也若十歲之外小兒宜加人參而已餘味不必加也

一小兒已出痘遍身上下盡是鮮血点粒粒可數此至佳之痘也不必發散只須助其正氣自然飽滿貫漿收靨亦速九日而始回矣然而純用補劑又慮呆補而無疏通之氣恐速于見功未免升上而不能降下亦非治之善也方用安幼湯當歸三錢荊芥一錢玄參三錢陳皮三錢熟地三錢麥冬三錢生甘草五分生地二錢黃連一分丹皮一錢貝母三分水煎服一劑而綻不必二劑也此方妙在補中帶散則痘瘡力足無內怯之憂散中定補則痘瘡大泄少外阻之禍世人不知治法往往一味是補所以多留後患耳至于一味呆散未有不將佳痘而變為惡瘡者每至死亡猶以為胎毒之未盡淨也仍用散火敗毒之劑以至不救謂非醫殺之而欲冀免于陰報也得乎幸人善用其方以安幼耳

一 小兒出痘其痘瘡之色紅盛煩渴大便乾燥小便短澀而黃赤脈洪大不倫舌上生瘡此陽症之瘡也切忌用濕熱之味然又不可見為大熱而即用寒涼之藥恐火熱太盛驟得寒涼而火不肯遽退熱不肯驟解反至生變者有之治法宜用寒而佐以化熱之品用涼而輔以散火之味則不達火熱之性而自得寒涼之益也方用金痘散火湯玄參三錢黃芩一錢生甘草一錢梔子一錢桔梗二錢生地二錢荊芥三錢炒黑當歸一錢水煎服一劑而熱毒火毒盡行解散矣此方用荊梔以清火又得玄參以退其浮遊之火更妙在用荊芥桔梗引火外出而生地當歸滋其腑臟之燥則雨潤風吹有不變火宅而清涼者乎所以獲解散之功而無背違之失也

一 小兒出痘痘瘡虛空而色又清白發瘡中癰身寒顫咬牙不已腹中虛脹上吐下瀉脈復沉細微弱此陰症之痘瘡也蓋內寒之極瘡不能發出必虛用大補氣血之藥而佐以溫熱之味則瘡無冰凍之虞倘不知其故而亦用寒散之品則痘瘡內陷而死亡頃刻矣是陰痘戒用陰分之藥明甚然而其中有似是而非者又不可不辨以痘瘡之善變也色白虛也而發瘡又有寔症身寒涼也而發顫又有熱症腹脹虛寒也而吐瀉又多寔熱之症既非虛寒而亦用溫熱之品安得不死乎然則終何以辯之吾辯之于舌焉舌紅者熱舌白者寒也舌紅而帶白者熱中之寒舌白而微紅者寒中之熱舌大紅而又燥熱之極也舌純白而又滑寒之極也倘舌白而又滑此陰症無疑方用祛陰救痘丹人參一錢當歸三錢白朮三錢附子三分荊芥一錢黃芪三錢水煎服一劑而色白者即變為紅陽回而寒之氣盡散矣此方用人參黃芪歸朮以補氣血氣旺而陰自難留血足而

陽自可復然後益之附子則奏功始神方中又加荊芥者以附子直攻其內非荊芥則不能引附子外散耳

一痘瘡初出隱於肌肉之間不見点粒人以為瘡毒之內藏而不肯遽出也孰知是氣虛而不能推送以發于外乎論理用升麻桔梗羌活之類亦能外發然而不補其氣而惟用散藥吾恐元氣益虛痘發之後未必無他病之生尚非治之善者也方用發痘散生黃芪二錢甘草五分當歸一錢桔梗一錢荊芥一錢防風二分水煎服一劑而点粒見再劑而痘盡出也可以不必再服藥矣此方之妙雖用桔梗荊芥防風之散藥而寔得黃芪當歸補氣之力則易于推送所以火毒不能隱藏一齊而盡出也

一痘瘡已見点後熱氣大盛瘡粒過多人以為火毒之太甚誰知是血虛而不能以潤乎若止用發散之劑而不用補血之藥則火盛水乾痘難貫漿矣故必須于補血之中而少佐之以解毒也方用養痘湯當歸二錢川芎一錢連翹五分麥冬一錢天花粉三分木通三分甘草二分水煎服一劑而熱退二劑而瘡粒明淨盡行貫漿矣此方之妙妙在當歸麥冬川芎為君而少用連翹木通天花粉為佐使則血旺而火不過炎熱消而毒不內隱故能速于收功而又無後患也

一痘瘡已出四五日後大小不等根窠不甚紅澤色暗頂陷不能起發者人以為火毒之倒塌也誰知是氣血之虧欠欲出而不能欲發而不得倘徒用化毒之藥則毒反不消倘徒用催漿之藥則漿反不貫變生不測往往有入于死亡者治之法必須于補氣之中而輔以化毒催漿之味方用

催痘湯人參三分牛蒡子一錢當歸二錢川芎一錢黃芪二錢茯苓一錢桔梗五分陳皮二分連翹三分肉桂半分水煎服一劑而色紅二劑而頂突貫漿矣此方之妙妙在用參芪歸芎之多而發散化毒為佐使氣足而不祛于中血足而不陷于內自然痘色潤澤而肥滿矣

一痘瘡至六日毒宜化漿宜行矣乃顏色不紅綻肥滿是氣血大虛也萬不可徒攻其大而妄用敗毒之味也必須以補氣補血為主方用護痘萬全湯人參五分黃芪一錢當歸二錢川芎一錢白朮二錢茯苓一錢陳皮三分牛蒡子三分桔梗五分天花粉三分水煎服一劑紅潤而肥滿矣不必二劑也此方之妙用全不去消毒攻火但補氣血而痘自外發且補中有散而補非呆補更易奏功所以有益無損而收萬全之效也

一痘瘡七八日宜漿滿足矣今瘡平漿薄飲食少減人以為毒氣之內陷也誰知是氣血之不充乎夫氣血之不充者由于脾胃之氣弱也脾胃氣弱則肝血不生肝血不生則脾胃之氣更弱又何能致漿足而瘡突哉治之法必須大補其脾胃之氣而少佐之補血之品氣血旺而脾胃自健脾胃健而痘瘡安得不充滿乎方用保痘湯人參一錢白朮二錢黃芪二錢當歸二錢麥冬二錢陳皮五分荊芥一錢如瘡加白芷三分蟬蛻二分不瘡不必加也如痘色白而薄倍加參芪一劑而白者不白薄者不薄矣此方純是補氣血而補氣更重于補血者以血得氣而易生也氣足血旺何愁漿薄哉自然飲食倍增漿老結靨矣

一痘瘡至九日十日之後漿稀痂薄人以為痘毒之內蘊也誰知仍是氣血之虧乎夫氣虛補氣血

虛補血又何碍乎然而氣血雖虛而痘毒未清不兼顧火毒一味呆補則火毒內藏亦恐痘愈之後有回毒之虞必須於補中微散之為得也方用全痘湯人參二錢白朮二錢牛蒡子一錢茯苓三錢陳皮三分當歸三錢通草一錢甘草五分荊芥一錢金銀花三錢水煎服一劑而漿厚靨高矣此方用人參而不用黃芪者以黃芪過于補氣且恐有脹滿之虞不若多人參既補氣而復無增悶之嫌耳尤妙在用牛蒡子金銀花于補中瀉毒得補之益而更獲散之利真善後之妙也
一痘瘡至十一二日身發潮熱飲食不思當靨不靨如落無托人以為毒氣之猶存也誰知是氣血之虛而毒多未化乎方用化痘仙丹當歸三錢白芍二錢人參一錢山查五粒黃芪三錢荊芥一錢牛蒡子一錢防風三分甘草一錢金銀花三錢水煎服一劑而胃氣開思飲食矣二劑全愈此方之妙用金銀花與荊芥牛蒡子參芪歸芍之中則胃氣不傷脾氣大旺氣血既潤復不尅土則火毒全解又安有留餘之患大凡痘瘡不補則火毒不出而痘瘡純補則火毒亦不盡出也今予補中用散所以未出能出而既出者盡出也

一痘已見形又出一層紅斑者此夾疹痘也或似斑而非斑或零星錯雜皆是夾疹之症人以為痘毒之深前未發出而後再發也誰知痘出之時而又感風寒使內熱留中閉塞腠理激動腑毒而並出乎治法宜臟腑並治然治臟不若先治腑也蓋痘毒出于臟疹毒出于腑臟之毒深腑之毒淺淺之毒先散而深之毒亦自難留故治痘須先治疹方用分痘湯升麻一錢玄參三錢麥冬三錢當歸二錢青蒿二錢生甘草二錢半夏五分生地三錢荊芥一錢水煎服一劑而疹全散矣此

方退陽明之火解肺經之熱妙在多用升麻引火向外發于皮毛雖曰消疹而寔所以成痘也又何必治疹之後再去治痘哉

一痘症雖發全數日之後身復發熱遍身發出紅斑瘡甚愈抓愈癢先出大小不一如粟米之狀漸漸長大如紅雲片人以為痘毒之尚存從前未經暢發故如此誰知是痘毒全無乃收痂大愈之後放心縱欲飲食過傷又兼風熱而成之此名為蓋痘疹似痘而非痘也治法散其風熱而不必顧其痘疹然風熱既解即有毒亦無不共解矣方用安痘湯玄參五錢當歸三錢連翹一錢白芍二錢丹皮二錢荊芥二錢甘菊花二錢升麻五分天花粉一錢水煎服一劑而斑輕再劑而斑盡散矣此方化毒而不耗其氣解熱而不損其血所以風熱全消而痘無變症耳

一痘瘡五六日後色變純黑或炭灰之色頭頂陷下不起飲食到口即吐此死症無疑所謂壞症也世醫到此無不辭去然而死中可以求生勿以其壞症而輕棄之也蓋小兒純陽之氣易離而陰氣難絕倘有一線之陰可續則引陰以接陽往往死者可以重生而生者得以不死我受異傳何敢獨秘不共傳以救萬世之小兒乎方用起死救兒丹人參三錢玄參一兩金銀花一兩白朮二兩當歸三錢麥冬三錢甘草一錢荊芥二錢天花粉二錢茯神三錢水煎服一劑黑變為紅再劑而陷者起乾者潤飲食知味矣此方之妙全在用金銀花與玄參之多既能解毒復善散火而又助之參朮歸冬則足以濟二味之力而益成其祛除之功所以能轉敗而為勝起死而變生也萬勿驚其為品之重與用參之多而減去其分兩蓋為不重火毒難消參不多則陰陽難復矣願人